

Siap siaga tanai tanggungjawab besar

BANDAR SERI BEGAWAN, Khamis, 30 Mac. - Universiti Islam Sultan Sharif Ali (UNISSA) melalui Fakulti Syariah dan Undang-Undang (FSU) telah mengadakan Majlis Makan Malam Undang-Undang atau 'Law Dinner' bertempat di Rizqun International Hotel, Gadong.

Acara tersebut merupakan aktiviti wajib bagi para mahasiswa dan mahasiswi program Dwi Ijazah Sarjana Muda Perundangan Syariah (BSL) sepanjang kursus pengajian.

Hadir selaku tetamu kehormat ialah Hakim Mahkamah Tinggi Syar'ie, Yang Arif Dato Seri Setia Awang Haji Zaimi bin Haji Talip.

Menurut tetamu kehormat majlis di dalam ucapannya menyatakan bahawa para mahasiswa dan mahasiswi semestinya siap siaga menanai tanggungjawab yang besar dalam menyahut tantangan masa depan di negara yang terus berkembang maju, pesat, membangun dan dinamik di dalam semua aspek bernegara dan berbangsa.

"Mereka adalah aset yang amat berharga dan pemegang candel yang utama dalam usaha merealisasikan hasrat negara seterusnya pada mendaulatkan pelaksanaan undang-undang Allah Subhanahu Wata'ala di Negara Brunei



HAKIM Mahkamah Tinggi Syar'ie, Yang Arif Dato Seri Setia Awang Haji Zaimi bin Haji Talip (tujuh, kiri) ketika hadir selaku tetamu kehormat pada Majlis Makan Malam Undang-Undang atau 'Law Dinner' Universiti Islam Sultan Sharif Ali (UNISSA) melalui Fakulti Syariah dan Undang-Undang (FSU) di Rizqun International Hotel, Gadong.

Siaran Akhbar : Universiti Islam Sultan Sharif Ali
Foto : Ihsan Rabiatul Haziqah Haji Amirul Husaini, Abdul Yamin bin Abd Kadir

Darussalam ini khususnya," tambah Yang Arif lagi.

Juga hadir, Rektor UNISSA, Dr. Awang Haji Norarfan bin Haji Zainal,

pengamal-pengamal undang-undang dari Pejabat Peguam Negara, Kehakiman Negara, Mahkamah-Mahkamah Syariah dan juga firma-firma guaman.

Timbalan Dekan Fakulti Syariah dan Undang-Undang, Dr. Dayang Hajah Hanan binti Pehin Datu Seri Maharaja Dato Paduka Seri Setia (Dr.) Haji Abdul Aziz dalam ucapan alu-aluannya menyatakan bahawa bidang

undang-undang mempunyai likulikunya yang sukar untuk dilalui berbanding dengan bidang-bidang yang lain.

"Oleh itu, bakal-bakal penyandang kerjaya undang-undang adalah mustahak dari awal-awal lagi untuk dibekalkan dengan semangat dan keyakinan diri yang kuat, bagi memelihara dan mempertahankan keluhuran undang-undang di dalam kehidupan bernegara dan bermasyarakat," ujarnya lagi.

Acara tersebut bertujuan antara lain untuk membina hubungan dan jaringan di antara para mahasiswa dan mahasiswi UNISSA yang menjalani

kursus undang-undang dengan pengamal undang-undang di Negara Brunei Darussalam.

Selain itu, ia juga berhasrat untuk menjadi sebagai platform untuk memberikan pendedahan kepada para mahasiswa dan mahasiswi untuk menerokai dunia guaman dengan interaksi secara berdepan (*in-person*) dengan individu-individu yang berpengalaman dalam bidang guaman sama ada Sivil mahupun Syariah.

Untuk memberkati majlis, Doa Selamat dibacakan oleh mahasiswa Fiqh Qada Tahun Dua, Awang Ahmad Hisyamuddin bin Haji Abdul Rahim.

Negara perlu terus memacu agenda reformasi

Dari muka 1

Jawatankuasa Pandu bersidang setiap bulan bagi setiap kumpulan juara untuk melaporkan perkembangan rancangan tindakan mereka, menentengahkan cabaran yang memerlukan sokongan daripada agensi lain yang berkaitan dan membentangkan prestasi proses utama.

Prestasi ini disokong oleh data dan statistik berkaitan yang dikumpul daripada setiap kumpulan juara. Walau bagaimanapun, sejak awal 2017 Sekretariat EODB dengan Unit PENGGERAK, secara proaktif sama-sama bagi mewujudkan kerjasama yang lebih baik antara sektor kerajaan dan swasta dan maklum balas yang membina semasa mesyuarat bulanan sebagai satu bentuk pengukuran yang berkualiti bagi menilai keberkesanan penambahbaikan.

Sasaran dan pelan tindakan telah dikenal pasti semasa Mesyuarat Jawatankuasa Pandu Ke-11 pada bulan November 2016 lalu dan terdapat kemajuan sejak tiga bulan kebelakangan ini termasuk beberapa reformasi proses sedang dijalankan yang akan meningkatkan beberapa petunjuk seperti Memulakan Perniagaan, Urusan Permit Pembinaan, Pendaftaran Hartanah, Pembayaran Cukai dan Perdagangan Rentas Boarders.

Pada masa yang sama, pembaharuan perundangan juga sedang dilaksanakan melibatkan Penguatkuasaan Kontrak, Penyelesaian Insolvensi, Perlindungan Minoriti Pelabur dan Peraturan Pasaran Buruh.

Salah satu kunci utama dalam memberi keutamaan tahun ini dari segi proses kerajaan adalah Perdagangan Merentas Sempadan, yang melibatkan beberapa agensi kerajaan di mana kerajaan telah berjaya dalam membuat penambahbaikan seperti pengenalan proses kelulusan serta-merta bagi kedua-dua pengimportan dan pengeksportan barangan dan ia menjimatkan untuk mendapatkan kelulusan dengan segera bagi barangan dan tertakluk kepada proses yang baharu.

Contohnya, jumlah permohonan yang mengambil masa lebih daripada dua jam untuk meluluskan pengisytiharan produk telah dikurangkan daripada 46 peratus pada bulan Ogos kepada 1 peratus pada bulan Februari dan dengan penswastan Pelabuhan Muara oleh Syarikat Pelabuhan Muara (MPC), usaha sama antara pengendali antarabangsa dan modal kerajaan, akan dilaburkan untuk membeli peralatan baru seperti Kren Dermaga dan Pengendalian Peralatan Kontena dan lain-lain.

Penswastan ini akan terus meningkatkan kecekapan operasi, kebolehpercayaan dan kapasiti pelabuhan yang seterusnya akan meningkatkan daya saing dengan pelabuhan utama lain di rantau ini.

Selain itu, terdapat juga pindaan undang-undang yang akan diwartakan kepada orang ramai dengan agensi kerajaan yang diberi kuasa dalam masa terdekat melalui sesi dialog dan juga laman *web* rasmi.

Pindaan tersebut akan menggalakkan lagi persekitaran yang *pro-business* dengan membenarkan mahkamah untuk mengurangkan jumlah masa dalam menyelesaikan kes-kes komersial, menyediakan perlindungan kepada syarikat-syarikat yang mempunyai masalah kewangan dan menggalakkan ketelusan melalui pentadbiran korporat yang lebih baik.

Sekretariat EODB juga telah mengambil inisiatif untuk meningkatkan akses dan maklumat dengan menyusun semula *www.business.gov.bn* dan ia akan berfungsi sebagai laman sesawang utama untuk berita, maklumat dan acara yang berkaitan dengan pembaharuan kerajaan.

Laman sesawang ini juga akan menyediakan perkhidmatan pemberitahuan kepada orang ramai yang mendaftar ke laman *web* sebaik sahaja terdapat sebarang pengemaskinian.

Inisiatif berkenaan merupakan sebahagian daripada strategi komunikasi urus setia untuk lebih mendekati orang ramai serta perniagaan di negara ini.

Rasulullah suri keteladanan, penyebar rahmat

MUKIM SENGKURONG, Jumaat, 31 Mac. - Dalam sama-sama mengimarahkan rumah Allah di negara ini, Masjid Sultan Sharif Ali buat julung kalinya mengadakan Kempen Solat Subuh bersempena Karnival Cinta Masjid bermula hari ini dan akan berakhir pada Ahad, 2 April 2017 bertempat di Masjid Sultan Sharif Ali, Kampung Sengkurong, di sini.

Menurut imam masjid tersebut, Awang Haji Hamdini bin Haji Garif, aktiviti yang diadakan selama tiga hari itu dianjurkan oleh kumpulan belia masjid berkenaan, Syababul Iman.

Tambahnya, sepanjang karnival diadakan pelbagai aktiviti diadakan yang dibukakan penyertaan kepada orang ramai dalam sama-sama mengimarahkan masjid.

Kempen Solat Subuh turut diserikan dengan tazkirah yang disampaikan oleh penceramah dari Kementerian



PARA jemaah masjid yang hadir semasa Kempen Solat Subuh bersempena Karnival Cinta Masjid.

Berita dan Foto : Haji Ariffin Mohd. Noor / Morshidi



PENCERAMAH dari Kementerian Hal Ehwal Ugama, Awang Mohd. Yusoff bin Haji Abdul Majid semasa menyampaikan tazkirah yang bertajuk 'Rasulullah Sebagai Suri Keteladanan dan Penyebar Rahmat' di Masjid Sultan Sharif Ali, Kampung Sengkurong.

Hal Ehwal Ugama, Awang Mohd. Yusoff bin Haji Abdul Majid yang membawa tajuk 'Rasulullah Sebagai Suri Keteladanan dan Penyebar Rahmat'.

Semasa menyampaikan tazkirah berkenaan, Awang Mohd. Yusoff turut mengongsikan keperibadian Baginda Rasulullah Sallallahu Alaihi Wasallam yang merupakan ikutan dan contoh umat Islam dalam memimpin dan memberi khidmat kepada orang yang dipimpin.

Rasulullah ujarnya, diutus sebagai rahmat kepada seluruh makhluk sesuai dengan firman Allah Subhanahu Wata'ala dalam Surah Al-Anbiya yang bermaksud "Tidaklah Kami mengutusmu, melainkan untuk menjadi rahmat bagi sekalian alam."

Terdahulu, Kempen Solat Subuh tersebut didahului dengan Sembahyang

Fardu Subuh Berjemaah yang diimamkan oleh Awang Haji Mohd. Zaidin bin Haji Mohd. Noor.

Tazkirah yang sama akan diadakan pada hari Sabtu, 1 April dengan tajuk 'Menempah Tiket Ke Syurga Allah' yang akan disampaikan oleh Daie Bertauliah MUIB, Awang Haji Abdul Rahman bin Ajak, manakala pada hari terakhir karnival, Ahad, 2 April, tazkirah yang membawa tajuk 'Masjidku Syurgaku' akan disampaikan oleh Pegawai dari Pusat Da'wah Islamiah, Dr. Haji Ismuhadi bin Haji Abdullah.

Orang ramai adalah dialu-alukan untuk menghadiri kempen ini dan maklumat lanjut boleh diperolehi melalui laman sosial penganjur iaitu Facebook : *Syababul Iman Mssa* atau laman sosial Instagram *@syababul_iman*.